

Ya Hulat kanlan

Hebreo

Paunan habi

A na inungkat di ha Hulat kanlan Hebreo ya ampaniwala kan Panginoon Jesus no hinoy nag hulat. Noa, muwang tamo ya nanulat ay mihay ampaniwala kan Panginoon Jesus, ya hi Panginoon Jesus ya habaytoy impangako, ya Mesias, ya Cristo, ya Mámiligtas, ya Anak ni Apo Namalyari, ya mamaala hén ayn angga, haka mam-in biyay ya ayn angga kanlan ampaniwala kana.

Di ha hulat ay ampakhawén nan nanulat ya nakém lan anhulatan na hén ihundo lay paniwala la, gawan main a ampaniwala ya anhumalanghang kanla hén main hadyay pamairap kanla. Hilay habaytoy ampamairap kanla ay ampaniwala ya a ya pon nilumaténg ya Mesias, ya Cristo, ya Mámiligtas, kabay kaatag ya an-êngganan la, alwan hi Panginoon Jesus.

An-ipaihip na kanla ya hi Panginoon Jesus ay Anak ni Apo Namalyari, haka hiya ay ayn kapantag ha hinon anghel, o hinon mámipamwang hén an-ipaihip kanla ni Apo Namalyari. Hi Panginoon Jesus ay inhagili ha pinakapoon pari ta hiyay nag-in mámilatan hén balang miha kan Apo Namalyari hén in-átang nay sarili na ha pamayad hén kasalanan tamo. Hiyay biniyay oman ni Apo Namalyari, haka gawan kana ay main biyay ya ayn angga ha langit ya balang ampaniwala kana.

Kabooan hén pinakalaman

Hi Apo Jesu-Cristo ay Anak ni Apo Namalyari *1:1-3*

Hi Apo Jesu-Cristo ay matag-ay ha kaganawan anghel *1:4-2:18*

Hi Apo Jesu-Cristo ay matag-ay kan apo Moises haka kan Josue *3:1-4:13*

Hi Apo Jesu-Cristo ay matag-ay kanlan pinakapoon pari *4:14-7:28*

Hi Apo Jesu-Cristo ay mámilatan hén bayoy kahundoan ya mangéd ha manan kahundoan *8:1-9:28*

Ya pamiátang ni Apo Jesu-Cristo hén sarili na, ay mangéd ha kaganawan átang *10:1-39*

Ya paniwala ya ayn kapantag, payo, haka panaad *11:1-12:29*

Ya pamanhumonol ya ampamahigla kan Apo Namalyari *13:1-19*

Inhalangin hilay hinulatan *13:20-21*

Tawlin habi *13:22-25*

**Impamwang ni Apo Namalyari no hino ya,
gawan kan Apo Jesu-Cristo, ya Anak na**

1 ¹Hêñ haton lagi, ay panay nan an-ipamwang ni Apo Namalyari ya kalabayan na kanlan ninuno tamo ha mal-at ya paraan, gawan kanlan mámipamwang na. ²Noa, amêhén, ay impamwang nay kalabayan na kantamo gawan ha Anak na. Gawan êt ha Anak na ay dinyag nay kaganawan. Haka ya Anak na ay pinili na hêñ dyanan hêñ habayto ngan. ³Atsi êt kanan Anak ya kapahilêw ya kahampatan haka ya panga-Diyos ni Apo Namalyari. Angkahêlêk ha Anak no ay-êmén ya ugali ni Apo Namalyari. Ya Anak ay ampamaala ha kaganawan ya atsi ha ayri man ya legal ha makapangyarihan ya utoh na. Ya Anak ay nanlinis kantamo ha kasalanan tamo, bayo nag-orong yay na ha langit ha dapit panabtab ni Apo Namalyari hêñ mamaala hêñ kalamo na.

**Matag-ay ya tungkulan ni Apo Jesu-Cristo, ya Anak ni
Apo Namalyari kanlan tungkulan lan anghel**

⁴Ya Anak ay dinyanan hêñ tungkulan ya matag-ay ha tungkulan lan anghel. Muwang tamoy habayto gawan “Anak” ya pamaëg kana ni Apo Namalyari, haka “anghel” bat ya pamaëg na kanlan anghel. ⁵Minghan man, ay a na hinabi ni Apo Namalyari ha hinon anghel ya hinabi na ha Anak na, ya wana,

“Hika ya Anak ko,

haka amêhén impamwang ko ya hiko ya Tatang mo!”^a

A na etaman hinabi hêñ tungkol ha hinon anghel,

“Hikoy mag-in Tatang na,

haka hiyay mag-in Anak ko.”^b

⁶Haka hêñ hato, hêñ marani na yay nan iutoh ya kamiha-mihaan nan Anak ha luta, ay êmén di ya hinabi na hêñ tungkol kanan Anak,

“Dapat yan simbaën hêñ kaganawan anghel ko.”

⁷Tungkol etaman kanlan anghel, êmén di ya hinabi na,

“Hilay anghel etaman ay pan-iutoh kon bêngat. Ha pamaghuyo la kangko ay malyari ko hilan iutoh hêñ nanad ha pan-iutoh koy angin o apoy.”

⁸Noa, matag-ay ya tungkulan nan Anak, ta ya hinabi ni Apo Namalyari kanan Anak na, ay êmén di,

“O Diyos, ya pamamaala mo ay ayn anggaan,

haka ampamaala ka, hêñ main katoynungan.

^a 1:5 Awit 2:7; Dyag 13:33 ^b 1:5 2 Samuel 7:14; 1 Cronica 17:13

- ⁹ An-ikahigla mo ya dyag ya main katoynungan,
noa, angkahêmêkan moy karawakan,
kabay hiko, ya Diyos mo, ay namili kamo,
hên dinyanan hên kahiglaan, ya igit pon ha kahiglaan hên hinon
kalamo mo.”^c
- ¹⁰ Haka wana êt ni Apo Namalyari hên tungkol ha Anak na,
“Hên una, ay hika Panginoon ya nanyag hên luta haka langit.
- ¹¹ Lumatêng ya allo, ay maanggaan ya habayto ngan,
noa, hika ay ayn anggaan.
Ya habayto ngan ay mag-in ayn pukat hên nanad ha gulot ya takop.
- ¹² Itapon mo ya habayto ngan ta hagilyan mina,
hên nanad ha gulot ya takop.
Noa, hika ay a ampangoman,
haka a antumoa o matsu man.”^d
- ¹³ Minghan man, ay a na hinabi ni Apo Namalyari ha hinon anghel ya
hinabi na ha Anak na, ya wana,
“Mikno ka ha dapit panabtab ko hên mamaala hên kalamo ko,
angga ha hambutêñ ko hilay kapatsi mo, ta idin ko hila ha aypaan
kapangyarihan mo.”^e
- ¹⁴ No êmbayro ay hino awud ya tungkul lan anghel? Hila ay espiritu,
ya a tamo mahêlêk, ya ampaghuyo kan Apo Namalyari, ta êmén
mahawpan kitamo ya miligtas.

Hi Apo Jesu-Cristo ya pinangubatan hên ayn kapantag ya kaligtasan tamo

2 ¹Gawan makapangyarihan ya Anak ni Apo Namalyari ha kaganawan
anghel, ay dapat pakapaniwal-an tamo ya kaptêgan ya intoro kantamo,
ta êmén a kitamo mipakarayo kanan habaytoy kaptêgan. ²Pêtêg ya Kautuhan
ni Apo Namalyari kanlan ninuno tamo, anghel na man ya namipamwang
hên habayto, ta hilay a hinumonol haka nanalanghang kanlan habayto, ay
nakatanggap hên parusa ya hêpat kanla. ³No êmbayro ya nalyari kanla, ay
kantamo pon kaya no araên tamoy kaligtasan ya ayn kapantag, ya unan
impamwang ni Panginoon Jesus, ya pinaptêgan kantamo hên hilay nakagilam
ha impamwang na. ⁴Haka habaytoy pinaptêgan êt hên kapangyarihan ni Apo
Namalyari hên hino-hino kay na hên ya kapapaêpapah. Pinaptêgan na êt hên
indin nan Espiritu na hên galing ha balang labay nan dyanan.

Hi Apo Jesu-Cristo ay nag-in tawo ta êmén na kitamo iligtas

⁵ A na indin ni Apo Namalyari kanlan anghel ya pamaala ha bayon luta
ya an-ungkatêñ ko. ⁶ Ha Kahulatan ya impahulat ni Apo Namalyari, ay
êmén di ya nakahulat,

^c 1:9 Awit 45:6-7 ^d 1:12 Awit 102:25-27 ^e 1:13 Awit 110:1

“Apo Namalyari, hino awud hilay tawo ta panay mo hilan ampansinêñ haka anhayhayêñ?

⁷In-aypa moy tungkulan la pon, hên maaypan pêrad ha tungkulan lan anghel.

Noa, tinalagá mo ya lumatêng ya allo ay ipadayêw haka ipagalang mo hila,

⁸ta iubuh mon idin ha aypa hên kapangyarihan la ya kaganawan dinyag.”^f

Ya labay nan habiêñ hên habaytoy nakahulat, ay ustion iubuh nan idin ni Apo Namalyari ya habayto ha aypa hên kapangyarihan lan tawo, ay taganán iubuh na kanla ya kaganawan dinyag. Pêtêg ya a tamo pon angkahêlêk ya habayto amêhêñ. ⁹Noa, muwang tamo ya natupad ya habayto gawan kan Apo Jesus, ya in-aypa pon ya tungkulan hên maaypan pêrad ha tungkulan lan anghel hên hiyay nag-in tawo, haka hiyay natsi ta êmén mapatawad ya kasalanan tamo, gawan ha ayn kapantag ya ingangalo ni Apo Namalyari. Haka amêhêñ hiyay dinyag hên ampamaala hên main kapangyarihan haka karangalan gawan habaytoy kamatsan na. ¹⁰Hêpat bat kan Apo Namalyari, ya nanyag hên langit haka luta, haka ampanayhay hên habayto, hên ipadann nay Anak na, hi Apo Jesus, ha kamatsan ta êmén hiyay mag-in Mámiligtas ya taganán ganap. Kabay mal-at ya magêtan na ha langit, ya ampaniwala kana.

¹¹Gawan hi Apo Jesus ya ampangalíh hên kasalanan lan ampaniwala kana haka hilay an-alihan kasalanan, ay mimihay Tatang, ay a na hilay na an-ikarêng-êy hên baêgêñ hilan patêl na. ¹²Anhabiêñ na kan Apo Namalyari,

“Ipamwang kata ha kaganawan patêl ko,
ha pagtsiponan la hên magsimba kamo, ay puriêñ kata!”^g

¹³Wana êt,

“Hikoy magtsiwala kan Apo Namalyari.”

Haka wana êt tungkol kanlan nanad patêl na,

“Atsi ko di hên kalamo hilay anak ni Apo Namalyari ya impatsiwala na kangko.”^h

¹⁴Gawan hilay habaytoy anak ya impatsiwala kana ay tawo, ya main lawini ya panluta ya matsu, ay hiyay nag-in tawo etaman, ta gawan ha kamatsan na, ay mahambut na hi Satanas ya ampanalan hên kapangyarihan hên kamatsan, hên alihêñ ya kapangyarihan na.

¹⁵Ha êmbayro ay nibuhan kitamo ya nanad nag-in ipoh ha kamatsan paubat hên in-anak kitamo, gawan limo tamon matsu. ¹⁶Malinaw ya alwan anghel ya anhawpan na, ta hikitamoy intad kaapo-apoan ni apo Abraham ya anhawpan na. ¹⁷Kabay kailangan hiyay mag-in tawo nanad

^f 2:8 Awit 8:4-6 ^g 2:12 Awit 22:22 ^h 2:13 Isaías 8:17-18

kantamo, ya patêl na, ta êmên ya mag-in pinakapoon pari tamo, ya maingaloën. Haka ta êmên ya mag-in mapaypaniwal-an ya mamilatan tamo kan Apo Namalyari. Ta ha pangamatsi na, ay hiyay pinarusaan ha ikapagpapatawad hên kasalanan tamo.¹⁸ Haka gawan hiyay nagtêh hên hadayay pamairap ha pamanukso, ay mahawpan na kitamo ha kaganawan tukso ya lumatêng kantamo.

**Matag-ay ya tungkulan ni Apo Jesu-Cristo, ya Anak,
kanan tungkulan ni apo Moises, ya tagahuyo**

3 ¹Patêl ha Panginoon, ya kapareho kon pinili hên mag-in maának ni Apo Namalyari haka hên makilamo kana ha langit, pakaihipên tamo ya in-utoh hi Apo Jesus, ya an-ipamwang tamo, hên mag-in pinakapoon pari ya namiúmang kantamo kan Apo Namalyari.
²Mahipêg yan nanyag hên tinalagá ni Apo Namalyari, ya namili kana. Mapaypaniwal-an ya hên nanad kan apo Moises ya mapaypaniwal-an hên namaala ya kanlan ninuno tamon Israelita, ya pamilya ni Apo Namalyari.
³Noa, matag-ay ya tungkulan ni Apo Jesus, kanan tungkulan ni apo Moises, hên nanad ha dapat igit dayêwên ya nanyag bali kanan bali ya dinyag na. ⁴Gawan kaganawan bali ay main nanyag, haka muwang tamo ya hi Apo Namalyari ya nanyag hên balang hino. ⁵Hi apo Moises, ay mapaypaniwal-an ha pamanayhay na ha pamilya ni Apo Namalyari, hiyay tagahuyo ni Apo Namalyari, noa, ya dinyag na ay alimbawan bat ha ipamwang ni Apo Namalyari lumatêng ya allo. ⁶Noa, hi Apo Jesu-Cristo etaman, ay Anak ni Apo Namalyari, ya mapaypaniwal-an ha pamamaala ha pamilya ni Apo Namalyari. Haka hikitamoy kalamo ha maának na no nananiêh ya paniwala tamo kana, haka no a tamo ikarêng-êy ya habaytoy paniwala.

Main pagpainawaan ha lokop ni Apo Namalyari

⁷Kabay kailangan tamon pansiñen ya hinabi ni Apo Namalyari ya impahulat nan Espiritu na, ya wanana hulat,
 “No nagilam yo amêhêh ya hinabi ko,
⁸ ay a yoy na pakdêyêh ya ulo yo, hên nanad kanlan ninuno yo,
 ya nanalanghang hên nanubuk kangko hên atsi hila ha legal ya kabalah-balahan.
⁹Panay la kon ansubukan hên hilay ninuno yo,
 angkahêlêk la man ya kapapaêpapah ya dinyag ko ha ikakangêd la
 ha apatapo ya taon.
¹⁰Kabay nagkamain akon huluk kanlan habayto,
 haka wangko ha sarili ko, ‘panay hilan ampagdayo kangko,
 haka a la anhonolêh ya hinon in-utoh ko kanla.’
¹¹Kabay ha hadayay huluk ko kanla, ay inhumpa ko,

ya taganán a hilay na makahowên ha pagpainawaan ya in-il-an ko.”ⁱ

¹² Hikaw ya patêl ko ha Panginoon, illagan yoy nakêm yo ha karawakan, ta êmén a kaw midayo ha paniwala yo kan Apo Namalyari, ya angkabiyay hên magpa ayn angga. ¹³ Ya dapat yon daygên, ay mipagpakhawan kaw hên paniwala ha miha ta miha hên allo-allo kaban main pon panaon, ta êmén ayn miha man kamoyu ya manalanghang kan Apo Namalyari gawan ha natukso yan nanyag kasalanan. ¹⁴ Dapat yon daygên ya habayto, gawan hikitamo ay main pamakilamo kan Apo Jesu-Cristo, no nakataniêh ya paniwala tamo kana hên angga ha anggaan biyay tamo.

¹⁵ Omanên tamon ihipêñ ya impahulat ni Apo Namalyari, ya wanana Kahulatan,

“No nagilam yo amêhêñ ya hinabi ni Apo Namalyari,
ay a yoy na pakdêyêñ ya ulo yo, hên nanad kanlan ninuno yo,
ya nanalanghang kan Apo Namalyari hên atsi hila ha legal ya
kabalah-balahan.”

¹⁶ Hino awud hilay habaytoy nakagilam habi ni Apo Namalyari, noa, nanalanghang kana? Hila ay ayn kaatag no alwan hilay in-awah ni apo Moises ha bansan Egipto! ¹⁷ Haka hino hilay habaytoy namahuluk etaman kan Apo Namalyari hên apatapo ya taon? Hila ay ayn kaatag no alwan hila êt ya nanyag kasalanan, haka natsi ha kabalah-balahan! ¹⁸ Haka hino hilay habaytoy inhumpa ni Apo Namalyari ya a hila makahowên ha pagpainawaan ya in-il-an na? Hila ay ayn kaatag no alwan hila êt ya a hinumonol kana! ¹⁹ Kabay malinaw ya a hila nakahowên ha pagpainawaan ya in-il-an na, gawan ayn hilan paniwala kana.

Ya pagpainawaan ya impangako ni Apo Namalyari ha lokop na

4 ¹ Amêhêñ, habaytoy pagpainawaan etaman ha lokop ni Apo Namalyari, ya impangako na, ay makahowên kitamo pon bayro. Kabay kaillag kitamo ta êmén ya balang miha kamoyu ay makalatêng bayro ha pagpainawaan. ² Ta hikitamo man, ay nakagilam hên mangangêd ya habi ya tungkol ha pagpainawaan nanad kanlan ninuno. Noa, a la pinakinabangnan ya nagilam la, gawan a la pinaniwal-an. ³ Ta hikitamo ya naniwala kan Apo Namalyari, ay makahowên bayro ha pagpainawaan na. Muwang tamoy habayto, ta makwa tamo ha hinabi na di, ya tungkol kanlan a naniwala, ya wana,

“Ha hadyay huluk ko kanla, ay naghumpa ko,

ya taganán a hilay na makahowên ha pagpainawaan ya in-il-an ko.”
Hinabi nay habayto, agyan nakal-an ya pagpainawaan na paubat hên nayari nay na ya pamanyag hên boon luta. ⁴ Gawan main yan impahulat

ⁱ 3:11 Awit 95:7-11

hi Apo Namalyari ha Kahulatan na ya tungkol ha ikapiton allo, ya êmên di, “Haka ha ikapiton allo ay nagpainawa hi Apo Namalyari hên nayari nay na ya pamanyag hên kaganawan dinyag na.”^j 5 Omanê tamon ihipên ya impahulat ni Apo Namalyari, ya wanana hulat,

“Taganán a hilay na makahowên ha pagpainawaan ya in-il-an ko.”

6 Hilay unan nakgilam hên mangangêd ya habi ya tungkol ha pagpainawaan ni Apo Namalyari, ay a nakahowên gawan ha pamanalanghang la. Êmbayro man, ay labay ni Apo Namalyari ya main makahowên ha pagpainawaan ya in-il-an na. 7 Kabay hên nakalabah hên nabuyot ya panaon, ta panaon ana lan Arin David, ay andyanan na pon ni Apo Namalyari hilay angkabiyay hên habayto hên panaon hên makahowên ha pagpainawaan na. Muwang tamoy habayto, ta makwa tamo ha impahabi na kan Arin David, ya wana, “Amêhê.” di ha habi ya inungkat kina, ya wanana habi,

“Amêhê, no nagilam yoy hinabi ni Apo Namalyari,
ay a yoy na pakdêyêna ya ulo yo.”

8 Ya banson Canaan ya pinaylakwan ni Josue kanlan ninuno tamon Israelita, ay alwan habaytoy pagpainawaan ya impangako ni Apo Namalyari, ta no habayto dayi ya legal, ay a yay na nangungkat hi Apo Namalyari hên kaatag pon ya panaon. 9 Ha maparah ya habi, ay main nakal-an ya pagpainawaan para kanlan ampaniwala kan Apo Namalyari nanad ha pagpainawaan na ha ikapiton allo. 10 Ta hilay makahowên ha pagpainawaan na, ay makapagpainawa ha dyag la hên nanad kana. 11 Kabay paka-pakikwanan tamo hên makahowên bayro, ta êmên a kitamo mag-in nanad kanlan unan a nakahowên gawan a la hinonol ya kalabayan ni Apo Namalyari.

12 Ta ya habi ni Apo Namalyari, ay nanad angkabiyay, ya madyag ngan ya dapat daygên hên main kapangyarihan. Ya anhabien na ay nanad êtak ya napikapaka ya ngalab, ya ayn kapantag ya tarêm, ya ampakataloh ha pilngoan haka utêk hên but-o. Habaytoy habi na ay ampakataloh ha nakêm haka ihip ta ampakaawah yan an-ihipên tamo haka hên labay tamon daygên. 13 Ayn hinoman ya makapagtago kan Apo Namalyari, gawan mambatol ya balang miha ha hêlêk na, haka pakibatan tamo kana ya kaganawan dinyag tamo.

Hi Apo Jesu-Cristo ay pinakapoon pari ya ayn kapantag

14 Magpakataniêh kitamo ha paniwala tamo ya an-ipamwang tamo, gawan hi Apo Jesus, ya Anak ni Apo Namalyari, ay pinakapoon pari^k ya ayn kapantag, ya atsi yana ha langit ha ampaidyanan ni Apo Namalyari. 15 Main kitamon pinakapoon pari ya taganán ampandámay

^j 4:4 Genesis 2:2 ^k 4:14 Hebreo 2:17

hên mangêd kantamo ta nadanasan na ya hinon tukso hên nanad ha tukso ya lumatêng kantamo, noa, hiya ay taganán a natukso hên nanyag kasalanan. ¹⁶Kabay a kitamina mag-alangan hên pakarani kan Apo Namalyari ya maingaloên, ta êmén na kitamo maingalwan hên mahawpan ha oras hên mangailangan kitamo.

5 ¹Kantamon Israelita, ya balang pinakapoon pari tamo, ay ampilién ni Apo Namalyari kanlan kapareho tamo, ta habaytoy pinakapoon pari ay mámilatan tamo, ya ampam-in pahalamat haka ampamiátang ta êmén mapatawad ya kasalanan. ²Hiyay ampandámay hên mangêd kanlan nakadyag kasalanan, gawan hiya man ay tawon bat ya main pamagkulang kan Apo Namalyari. ³Kabay hiya man, ay ampam-i êt hên átang para ha sarili nan kasalanan, alwan bat para ha kasalanan lan kaatag. ⁴Haka ya mag-in pinakapoon pari ay ampilién ni Apo Namalyari, hên nanad ha pamili na kan Aaron ya unan pari tamon Israelita. Alwan pinakapoon pari ya ampamili hên sarili na hên dyanan karangalan hên mag-in pinakapoon pari.

⁵Embayro êt hi Apo Jesu-Cristo, ay a namili hên sarili na hên dyanan karangalan hên mag-in pinakapoon pari, ta hi Apo Namalyari ya namili kana, haka naghabi kana, ya wana,

“Hika ya Anak ko,

haka amêhêñ impamwang ko ya hiko ya Tatang mo!”^l

⁶Bayo impahulat na êt ni Apo Namalyari ha Kahulatan ya,

“Ya pangapari mo ay ayn angaan,

hên nanad ha pangapari ni Melquisedec ya ayn anggaan.”^m

⁷Hên atsi ya pon di ha luta hi Apo Jesus, ay nakiingalo yan nanalangin kan Apo Namalyari, ya makapiligtas kana ha kamatsan. Ha panalangin nan boon nakêm, ay in-ikhaw nay habi na hên main kalamoy hadyay tangih, haka nagilam ya panalangin na, gawan ha pagpakaaypan nakêm na ha pamanhumonol kan Apo Namalyari. ⁸Anak ya man ni Apo Namalyari, ay gawan ha hadyay kairapan ya dinanan na, ay naintindihan na ya labay habiên hên mag-in mahonol. ⁹Haka gawan ayn pamagkulang ha pamanhumonol na ha impadyag kana ni Apo Namalyari, ay hiyay nag-in ampangubatan hên ayn anggay kaligtasan lan kaganawan ya ampanhumonol kana, ¹⁰gawan hiyay pinili ni Apo Namalyari hên mag-in pinakapoon pari hên nanad ha ayn angga ya pangapari ni Melquisedec.

Kaillag kitamo ta kayno matalibatokan tamoy paniwala tamo

¹¹Mal-at pon dayi ya labay naêñ habiên kamoyu ya tungkol ha pangapari ni Apo Jesu-Cristo haka ya pangapari ni Melquisedec, noa, mairap hên ipalinaw ya habayto kamoyu, ta nanad ayn nanan anhumwên

^l 5:5 Awit 2:7; Dyag 13:33; Hebreo 1:5 ^m 5:6 Awit 110:4

ha ihip yo. ¹²⁻¹³Ha kaptêgan, ay nabuyot kaw nan ampaniwala, kabay dapat dayi, ay maaralan yoy nay kapareho yo, noa, angga amêhêñ kailangan yo pon êt hêñ patoro ha unan intoro kamoyu ubat ha habi ni Apo Namalyari. Ya kaalimbawaan yo ay anak ya ampanoho pon ya a ampakagatbat hêñ mantêg pamangan. Ya labay habiêñ ya a yo pon mamwangan no hinoy mangêd ya dyag haka no hinoy narawak ya dyag. ¹⁴Ta ya malalê ya toro ya maialimbawa ha mantêg ya pamangan ay para kanlan manakêm, ta nalêmaw hilay nan mamili no hinoy mangêd ya dyag haka mamalay hêñ mangara ha alwan mangêd ya dyag.

6 ¹Kabay a tamina orongêñ bat ya unan intoro kantamo ubat ha habi ni Apo Namalyari ya tungkol kan Apo Jesu-Cristo, noa, paulayan tamo hêñ mapahanan ya pamangintindi tamo ta êmêñ kitamo mag-in manakêm. Alwa taminan piorong-orongan hêñ pag-aralan bat ya unan intoro kantamo, ya dapat paghêhêan hêñ talibatokan ya pamanyag hêñ ayn pukat haka dapat maniwala kan Apo Namalyari, ²haka ya toro ya tungkol ha pamawtismo, ya paypalunto hêñ gamêt no ihalangin hilay binawtismoan, ya pangoman mabiyay hêñ hilay natsi, haka ya parusa ya ayn anggaan. ³Kabay ha hawop ni Apo Namalyari, ay pahanan tamo ya kamwangan tamo ya tungkol ha paniwala kan Apo Jesu-Cristo.

⁴Ta hilay nanalibokot ha unan intoro kanla ay ahina makaorong hêñ maniwala kan Apo Jesu-Cristo. Mana hilay nan nahawangan hêñ Espiritu ni Apo Namalyari haka nadanasan lay nay kapangyarihan na haka ya ayn kapantag ya ingalo na. ⁵Naranasan la êt no ay-êmêñ kakangêd ya habi ni Apo Namalyari haka ya kapangyarihan na ya iubuh nay nan ipamwang lano. ⁶No tinalibatokan lay habayto, ay a hilay na makaorong kan Apo Jesu-Cristo, ta nanad ha impako la yan oman ha koros hêñ impakarêng-êy ha arapan hêñ kal-atan.

⁷An-ingalwan ni Apo Namalyari ya hilay ampaniwala, ya nanad luta ya panay angkauranan, haka angkatuboan hêñ kal-atan tanaman ya mapakinabangnan. ⁸Noa, no antumabon ya habaytoy luta hêñ tanyuong haka kinêw ya nipagdiwi, ay ayn yan pukat. A mabuyot ay ihumpa ya habayto bayo ulamêñ. Êmbayro êt ay parusaan ni Apo Namalyari hilay nanad hatoy luta ya antumabon.

⁹Anlugurêñ naêñ patêl, êmbayro man ya pamanulat naêñ, ay angkasigurado naêñ ya a malyari kamoyu ya êmbayro, ta madyanan na kaw ni Apo Namalyari hêñ ikakangêd yo, ya an-idin na kanlan atsi ha dann hêñ kaligtasan. ¹⁰Taganán makatoynungan ya. A na liwaan ya dinyag yo ha ikakangêd na, haka ya pamanlugud yo kana, ya impahlêk yoy na, haka ya an-ipahlêk yo angga amêhêñ ha pamanawop yo ha kapareho yon pinili na hêñ mag-in kana. ¹¹Labay-labay naêñ dayi hêñ mahêlêk ha balang miha kamoyu ya ihundo yoy habaytoy pamanlugud yo angga ha anggaan, ta êmêñ sigurado yon matanggap ya an-êngganan

yo. ¹²A naêñ labay ya mag-in mabarog kaw ha pamanhumonol kana, ta labay naêñ hên totoêñ yo hilay naniwala haka nagtêêh, ya hilay makatanggap hên impangako na.

Ya impangako ni Apo Namalyari ay sigurado

¹³Hêñ nangako ya hi Apo Namalyari kan apo Abraham, ay nanumpa ya ha sarili na ya tuparêñ nay habayto gawan ayn makapangyarihan kana. ¹⁴Wani Apo Namalyari kan apo Abraham, “An-ipangako ko kamo ya ingalwan kata haka pakal-atêñ ya mag-in kaapo-apoan mo.”ⁿ ¹⁵Hi apo Abraham ay nagtêêh hêñ nangênggan hêñ angga ha natanggap nay habaytoy impangako kana. ¹⁶No hikitamoy ampanumpa, ay ampanggamit kitamon langan hêñ mihay makapangyarihan kantamo, haka no main manumpa, ay sigurado ya habayto. ¹⁷Embayo êt, hêñ nangako ya hi Apo Namalyari kan apo Abraham, ay nanumpa ya, ya tuparêñ nay habayto. Dinyag nay habayto, ta êmén na maipahlék kanlan pinangakoan na, ya a ampangoman ya anhabiên na. ¹⁸Atsi kantamo ya pangako na haka ya humpa na, ya a maoman gawan a ya ampaglaram. Kabay malyarin mag-in makhaw ya nakêm tamo ya tampol hêñ nagpahawop kana, hêñ nangênggan ha impangako na kantamo. ¹⁹Habaytoy an-êngganan tamo kana, ay ampamataniêh hêñ paniwala tamo. Ta ya paniwal-an tamo ay hi Apo Jesus ya nanad nakadann ana ha pinagpênlan bayro ha Pinakabanal ya Kuwarto ha Templo ha langit ha arapan ni Apo Namalyari. ²⁰Nuna yay na bayro hi Apo Jesus hêñ nag-in mamilatan tamo kan Apo Namalyari ta hiyay nag-in pinakapoon pari hêñ ayn anggaan, hêñ nanad ha pangapari ni Melquisedec.

Ya tungkol kan Melquisedec ya pari ni Apo Namalyari

7 ¹Hi Melquisedec^o etaman, ay ari ha balayan Salem haka pari ni Apo Namalyari. Hêñ haton lagi, hêñ ubat hilan apo Abraham hêñ nanambut kanlan apat ya ari, ay hi Melquisedec ya nanupa kana haka inhalangin na ya, ya ingalwan na ya ni Apo Namalyari. ²Bayo indin ni apo Abraham kan Melquisedec ya ikamapo hêñ nakwa na kanlan ari ya nahambut na. (Ya labay habiên hêñ langan Melquisedec, ay “Ari hêñ Katoyungan.” Ya labay habiên hêñ Salem ay “kapatêkbêkan.” Gawan hiyay ari ha balayan Salem, ay hiyay “Ari hêñ Kapatêkbêkan” etaman.) ³Ayn inungkat hêñ tungkol ha toa haka ninuno na. A êt inungkat no nakano yan in-anak o no nakano yan natsi. Ya pangapari na ay nanad ha pangapari nan Anak ni Apo Namalyari ya ayn angaan.

⁴Ihipêñ tamo ya matag-ay ya tungkulon ni Melquisedec, ta hi apo Abraham man, ya ninuno tamo, ay nam-i kana hêñ ikamapo ha nakwa

ⁿ 6:14 Genesis 12:4; 22:16-17; 25:26 ^o 7:1 Genesis 14

na kanlan ari ya nahambut na.⁵ No kaapo-apoan ni Levi dayi hi Melquisedec, ay maparah tamon maintindihan no awta hiyay dinyanan hēn ikamapo ni apo Abraham. Ta hikitamoy Israelita, ay anhumonol ha utoh ya dapat kitamon mam-i hēn ikamapo ha angkapopol tamo, haka ha kaganawan pinagpagalan tamo, kanlan kaapo-apoan ni Levi ya magpari kantamo, pare-pareho kitamo man kaapo-apoan ni apo Abraham.⁶ Noa, hi Melquisedec, ay alwan kaapo-apoan ni Levi, êmbayro man, ay hiyay dinyanan ni apo Abraham hēn ikamapo. Haka hiyay nanalangin ya ingalwan ni Apo Namalyari hi apo Abraham agyan hi apo Abraham, ya pinangakoan ni Apo Namalyari hēn hato.⁷ Muwang tamo ya matag-ay ya tungkulon nan ampanalangin kanan an-ihalangin na. Bayro tamo mamwangan ya matag-ay ya tungkulon ni Melquisedec kanan tungkulon ni apo Abraham.⁸ Haka hilan kaapo-apoan ni Levi ya andyanan hēn ikamapo, ay angkamatsi. Noa, hi Melquisedec etaman, ay nanad angkabiyay ya pon, gawan ayn kitamon mabáha ha habi ni Apo Namalyari ya hiya ay natsi.⁹ Malyari êt habiên ya hilan Levi ya ampananggap hēn ikamapo, ay nanad kalamo ni apo Abraham hēn nam-in ikamapo kan Melchizedec,¹⁰ ta hi Levi ay kaapo-apoan ni apo Abraham, haka a ya pon in-anak hēn nam-i yan ikamapo kan Melchizedec hi apo Abraham.

**Ya pangapari ni Panginoon Jesu-Cristo, ay nanad
ha ayn anggay pangapari ni Melquisedec**

¹¹ Ha pam-i ni Apo Namalyari hēn Kautuhan kanlan ninuno tamon Israelita, ay tinalagá na ya hilay kaapo-apoan ni Levi ay mamaala ha pamiátang kana. Noa, ya pamiátang la ha pangapari la, ay a makapakangêd hēn tawo. Kabay kailangan lay pari, ya nanad ha pangapari ni Melquisedec, alwa hēn nanad ha pangapari ni Aaron ya kaapo-apoan ni Levi.¹² Haka no kailangan hēn hagilyan ya pangapari, ay kailangan êt hēn hagilyan ya Kautuhan tamon Israelita.¹³⁻¹⁴ Muwang tamo ya nahagilyan ya habaytoy pangapari gawan hi Panginoon Jesu-Cristo ya inhagili ni Apo Namalyari ha pangapari lan kaapo-apoan ni Levi, ay alwan kaapo-apoan ni Levi ta hiyay kaapo-apoan ni Juda. Haka ayn yan hinabi hi apo Moises ya main kaapo-apoan ni Juda ya mag-in pari bayri ha luta.

¹⁵ Nag-in malinaw ya hinagilyan ya manan pangapari, hēn nilumatêng ya kaatag ya pari ya nanad kan Melquisedec.¹⁶ Habaytoy pari ay pinili hēn alwan gawan ha ninuno na, ha pamanhumonol ha Kautuhan. Noa, hiyay pinili gawan ha kapangyarihan na hēn hinambut nay kamatsan. Hiyay alwan kaatag no alwa hi Panginoon Jesus. (Haka ya habaw hēn ubas etaman ya ampihipwak, ay alwan kaatag no alwa ya daya ya in-alimbawa ha habaw hēn habaytoy ubas.)¹⁷ Ta êmén di ya impahulat ni Apo Namalyari ya tungkol kana,

“Hika ya mihay pari ya ayn anggaan,
hēn nanad ha pangapari ni Melquisedec ya ayn anggaan.”

¹⁸Kabay hinagilyan ya manan utoh hēn tungkol ha pangapari ni Levi gawan habayto ay main pamagkulang. Haka habaytoy utoh ay ¹⁹a nakapakangēd hēn tawo ha hēlēk ni Apo Namalyari. Noa, gawan kan Panginoon Jesus ya inhagili ha pangapari lan kaapo-apoan ni Levi ay ampakarani kitamina kan Apo Namalyari hēn ayn pamagkulang ha hēlēk na.

²⁰⁻²¹ Ya pangapari lan kaapo-apoan ni Levi, ay ayn kalamoy pangako. Noa, ya pangapari ni Panginoon Jesus ay main kalamoy humpa ni Apo Namalyari, gawan wani Apo Namalyari,

“Hiko ya Panginoon ya nangako,
haka a mangoman ya ihip ko,
‘Hika ay pari hēn ayn anggaan!’ ”^p

²²Kabay hi Panginoon Jesus ay nag-in kasiguradoan hēn bayoy kahundoan ni Apo Namalyari ha tawo ya mangēd ha unan kahundoan.

²³Haka mal-at ya kaapo-apoan ni Levi ya honol-honol hēn nag-in pari gawan hila ay tawo bat ya main anggaan ya biyay. ²⁴Noa, ya pangapari ni Panginoon Jesus ay ayn angga, ta hiyay angkabiyay hēn ayn angga.

²⁵Gawan a ya matsu hi Panginoon Jesus, ay ayn angga ya kapangyarihan na hēn mamilitas kanlan ampaniwala ya hiyay makapaidani kanla kan Apo Namalyari. Gawan hiyay ampamiyay hēn ayn angga hēn ampakihabi kan Apo Namalyari hēn para kantamo.

²⁶Kabay hiyay pinakapoon pari ya kailangan tamo ya banal, ya taganán ayn kapintasan. Hiyay alwan nanad kantamo ya makasalanan, haka hiyay dinyanan kapangyarihan ya ayn kapantag ha langit. ²⁷Hiyay alwan nanad kanlan pinakapoon pari ya ampamiátang hēn allo-allo, hēn para ha sarili lan kasalanan, haka para ha kasalanan lan kaatag. Ta minghan nan bat in-átang ya sarili na para ha kasalanan tamo, haka hukad ya habayto. Ahina hēn kailangan omanén o pahanan pon ya habayto. ²⁸Ha pamanhumonol ha Kautuhan ni apo Moises, ay tawon bat, ya main pamagkulang kan Apo Namalyari ya pinili hēn mag-in pinakapoon pari. Noa, gawan ha bayoy kahundoan ni Apo Namalyari ya main humpa, ay pinili nay Anak na hēn mag-in pinakapoon pari, ya banal hēn angga-angga.

Hi Apo Jesu-Cristo ya mámilatan ha bayoy kahundoan ni Apo Namalyari ha tawo

8 ¹Habaytsi ya maalagá ya labay naén hēn mamwangan yo: ha dapit panabtab ni Apo Namalyari ha langit, ay main kitamon banal ya

pinakapoon pari ya ampamaala hên kalamo ni Apo Namalyari. ²Yabay ya hi Apo Jesus ya pinakapoon pari ya ampaghuyoy na ha mantêg pagsimbaan ha langit ya dinyag ni Apo Namalyari, alwan tawo.

³Di ha luta, ya balang pinakapoon pari, ay main tungkulon hên mam-in digalo haka mamiátang kan Apo Namalyari, ta êmén mapatawad ya kasalanan. Kabay kailangan ni Panginoon Jesus, ya pinakapoon pari tamo, hên main yan iátang.⁴ ⁴Noa, ya pangapari na ay alwan bayri ha luta, ta no atsi ya pon dayi di ha luta, ay alwa yan pari, gawan main nanan pari ya ampamiátang bayri ha pamanhumonol ha Kautuhan ni apo Moises. ⁵Ya pamaghuyo la ay atsi ha pagsimbaan ha luta, ya nanad aninon bat hên mantêg pagsimbaan kan Apo Namalyari ha langit. Ta hên ipairêng na dayi ni apo Moises ya toldan pagsimbaan di ha luta, ay impapaka-utoh kana ni Apo Namalyari, ya wana, “Sakto mon ipairêng ya impahlék ko kamo bayro ha tawgtug.”⁶ ⁶Noa, ya pamaghuyo ni Apo Jesus ay mangêd ha pamaghuyo lan kaapo-apoan ni Levi, gawan hi Apo Jesus, ay mámilatan ha bayoy kahundoan ni Apo Namalyari ha tawo. Ya bayoy kahundoan ay mangêd ha unan kahundoan haka main yan kalamoy pangako ya mangêd ha unan pangako.

⁷No ayn dayin pamagkulang ya unan kahundoan, ay ahina dayi hên kailangan hên hagilyan hên bayo ya habayto. ⁸Noa, impamwang ni Apo Namalyari ya main pamagkulang ya hilay Israelita ha pamanhumonol ha unan kahundoan, ta wana,

“Lumatêng ya allo, ay manyag akon bayoy kahundoan kanlan kaapo-apoan ni apo Jacob, hilay ampaidi ha Israel haka hilay ampaidi ha Juda.

⁹ Habaytoy alwan nanad ha kahundoan ko ha ninuno la, hên inligtas ko hila ha pangaipoh la ha bansan Egipto.

A la hinonol ya kahundoan naêñ, kabay pinaulayan ko hilay na.

¹⁰ Habaytsi ya mag-in kahundoan ko kanlan Israelita,

lumatêng ya allo, ay itaném koy utoh ko ha ihip la, ta êmén habaytoy nay labay lan honolên.

Hikoy mag-in Diyos la,
haka hilay mag-in anak ko.

¹¹ A lay na kailangan hên miaaral.

A lay na êt hên kailangan hên habiên ha kapareho la, ya ‘Dapat mon kilalaêñ ya Panginoon, ya hiyay Diyos.’

Ta kanan habayto ay maubuh hilan makamwang kangko, hinoman ya tungkulon la ha biyay.

¹² Ta patawarên ko hila ha pamanyag lan karawakan,

^q 8:3 Hi apo Jesus etaman, ay alwan ayop ya in-átang na, ta indin nay lawini na. Mabáha ya habayto ha Hebreo 9:12 ^r 8:5 Exodo 25:40

haka liwaan koy kasalanan la.”^s

¹³ Ha pangungkat ni Apo Namalyari hên bayoy kahundoan, ay labay habiên, ayn nanan pukat ya unan kahundoan, gawan habayto ay maranin maplak.

Ya pagsimbaan bayri ha luta haka ha langit

9 ¹Ha unan kahundoan ni Apo Namalyari, ay mal-at ya patakaran no ay-êmén ya pamagsimba kana, haka tungkol ha tolda ya pagsimbaan kana. ²Habaytoy toldan pagsimbaan, ay main loway kuwarto ya pinagpêlan ya ilwangan. Ya unan kuwarto ya howénén, ay ambaêgén Kuwarto ya Banal. Atsi bayro ya paybul-ihan solo, haka ya lamisa ya nag puto, ya in-átang kan Apo Namalyari. ³Main makogpaw ya takop ya pinagpêlan bayro ha ikalwan kuwarto ya pagsimbaan ya atsi ha pinakalalé, ya ambaêgén Kuwarto ya Pinakabanal. ⁴Atsi bayro ya gintoy paybul-ihan^t hên paypaahukan hên pabango ha pamagsimba kan Apo Namalyari. Atsi êt bayro ya Baol hên Kahundoan, ya nilatopan hên ginto. Bayro ha lalén Baol ay nag silyaw ya dyag ha ginto ya nag laman hên habaytoy pamangan ya ubat ha langit ya ambaêgén manna. Atsi êt bayro ha Baol ya têkén ni Aaron ya nanlanubu, haka ya pinipakay bato ya pinamidukitan hên Kautuhan ni Apo Namalyari. ⁵Ha babo hên takap hên habaytoy Baol, ay main impairêng ya nanad loway anghel^u ya nag pakpak, ya pamaptêg ya atsi bayro hi Apo Namalyari. Angkahalokoban hên pakpak la ya takap hên habaytoy Baol, ya legal ya pamakikwaan ingalo. Noa, a naén pon iubuh hên maipalinaw ya habayto di ha hulat amêhén.

⁶Êmbayro ya pangadyag ha lalén tolda ya pagsimbaan kan Apo Namalyari. Allo-allo hilan hinumwén ha unan kuwarto hilay pari ta bayro lan andaygén ya tungkulon lan magsimba. ⁷Noa, ya pinakapoon pari bat ya nakahowén ha ikalwan kuwarto haka minghan bat ha mihay taon. A ya nakahowén no ayn yan anggétan hên daya hên ayop ya iátang, ta êmén kikwan patawad ha kasalanan na, haka kasalanan nan kapareho nan Israelita, ya a la tinalagá. ⁸Ha êmbayro, ay an-ipalinaw nan Espiritu ni Apo Namalyari, ya ayn bat ampakaarap kan Apo Namalyari no a maoman ya unan utoh hên tungkol ha pagsimbaan. ⁹Habaytoy toldan pagsimbaan ha luta ay mapangwaan tamon aral amêhén. Habaytoy pam-in digalo haka pangiátang ta êmén mapatawad ya kasalanan lan nakadyag kasalanan, ay a makapatékbék hên nakém lan ampagsimba gawan a hila makaalih hên kasalanan. ¹⁰Habaytoy utoh ay panay tungkol bat hên lawini hên nanad ha hinoy bawal hên tungkol ha pamangan,

^s 8:12 Jeremias 31:31-34 ^t 9:4 Hêlkên ha panlêkan labay habiên hên habi. ^u 9:5 anghel: ya nakahulat ay kerubin. Hêlkên ha panlêkan labay habiên hên habi.

inêmên haka pamaglinis hên lawini. Habaytoy dapat honolên angga ha a pon indin ni Apo Namalyari ya bayoy kahundoan.

¹¹ Noa, amêhêñ nilumatêng hi Apo Jesu-Cristo, hên nag-in pinakapoon pari tamo haka magbêlêkêbêk ha békê tamo ya kangêran ya ubat ha bayoy kahundoan. A ya ampaghuyo ha pagsimbaan lan ninuno, ta atsi yay na ha langit ha mantêg pagsimbaan kan Apo Namalyari. Habaytoy mangêd ha pagsimbaan lan ninuno gawan a ya dinyag hên tawo haka ayn ya di ha luta ta atsi ya bayro ha langit. ¹² Ya pamanhumwêñ na bayro ay minghan bat, haka alwan gawan ha daya hên kambing o biseron baka, noa, ha sarili nan daya, ya pamayad hên parusan kasalanan tamo ta êmên kitamo miligtas hên angga-angga. ¹³ Main pukat ya inwihik ya daya hên kambing, baka haka abo hên in-ulam ya biseron baka, ya inwihik ha ninuno tamo. Habaytoy nakalinis kanla ha kaganawan dinyag lay nakarêmêk kanla, ta êmên matanggap ni Apo Namalyari ya pamagsimba la.^v ¹⁴ Noa, taganán makapangyarihan ya daya ni Apo Jesu-Cristo kanan daya lan habaytoy ayop. Awo, gawan bay, ha kapangyarihan nan Espiritu ni Apo Namalyari, ya ampamiyay hên ayn angga, ay indin ni Apo Jesu-Cristo ya biyay na, ya ayn kapintasan. Habaytoy daya na ay nakalinis hên nakêm tamo ha kaganawan dinyag tamo ya ayn pukat. Kabay makapagsimba kitamo kan Apo Namalyari ya angkabiyay.

¹⁵ Kabay hi Apo Jesu-Cristo ay mamilatan bayro ha bayoy kahundoan ni Apo Namalyari ha tawo, ta êmên hikitamoy pinili ni Apo Namalyari hên mag-in kana, ay madyanan biyay ya ayn anggaan. Habaytoy malyari gawan ha pangamatsi na, ya nangakbus kantamo ha parusa hên kasalanan tamo, ya a kitamo hinumonol ha unan kahundoan.

¹⁶ Habaytoy nanad ha mihay mabandi ya main hulat no hinoy pamibalagan nan pibandian na no matsi ya. Ayn makinabang hên habayto angga ha mapaptêgan ya natsi yay nay mabandi, ¹⁷ta habaytoy hulat ay ayn pukat kaban angkabiyay pon ya mabandi. ¹⁸ Embayro êt ha unan kahundoan, main pinatsi, bayo nagkamain alagá ya habaytoy kahundoan.^w ¹⁹ Alimbawa hi apo Moises hên naipamulah nay Kautuhan kanlan kapareho nan Israelita, ay nangwa yan daya hên kambing haka biseron baka ya pinatsi la, bayo pinahanan nan lanêm. Nangwa yan naorit ya habot tupa ya impêtêh na ha yagaw hên isopo haka na indêrê ha daya ta inwihik na ha tawo haka ha naka-tsili-tsil ya papel ya pinangihulatan hên Kautuhan. ²⁰ Kaban andaygêñ nay habayto ay wani apo Moises, “Hata daya ay pamaptêg ya maalagá ya hata kahundoan ya an-ipahonol kamoyu ni Apo Namalyari.” ²¹ Winihikan na êt ya

^v 9:13 Bilang 19:1-18 ^w 9:18 Ha kaugalian lan Israelita, ay no main lowa kanla ya main kahundoan, ay mamatsi hila pon hên hinon ayop ta êmên magkamain pukat ya habaytoy kahundoan. Genesis 15

toldan pagsimbaan la kan Apo Namalyari haka ya anggamitên la ha pamaggisimba la. ²²Ha pamanhumonol ha Kautuhan, ay ayn angkalinisan, no ayn pon ipadaya ya ayop. Êmbayro etaman ayn kapatawaran ha kasalanan no ayn ipadaya.^x

²³Habaytoy toldan pagsimbaan ay nanad aninon bat hêñ mantêg pagsimbaan kan Apo Namalyari ha langit. Êmbayro man, ay habaytoy kailangan hêñ malinisan hêñ dayan ayop, kabay habayto etaman ya mantêg pagsimbaan kan Apo Namalyari ha langit, ay kailangan hêñ daya ni Apo Jesu-Cristo ya maalagá ha dayan ayop. ²⁴Ta mantêg pagsimbaan kan Apo Namalyari ha langit ya hinowênan ni Apo Jesu-Cristo hêñ nag-in mamilatan kantamo hêñ angga-angga. A ya hinumwêñ ha pinakalalêñ pagsimbaan ha luta, ya nanad aninon bat hêñ mantêg pagsimbaan. ²⁵Ya dinyag ni Apo Jesu-Cristo, ay minghan bat, alwan nanad kanlan pinakapoon pari ya taon-taon hêñ ampantan hêñ daya hêñ ayop ha Pinakabanal ya Kuwarto ya atsi ha pagsimbaan lan ninuno. A na kailangan hêñ pioman-oman hêñ mamiâtang lawini na. ²⁶Ya pamiâtang nan sarili na, ay minghan bêngat, haka hépat ya habayto hêñ angga ha anggaan hêñ luta. No alwa dayi hêñ êmbayro, ya minghan bêngat, ay kailangan dayi ya paoman-oman ya pangamatsi na paubat hêñ dinyag ya luta ta êmén maalíh ya kasalanan. ²⁷Tinalagá ni Apo Namalyari ya maubuh kitamon matsu hêñ minghan bêngat, bayo hatolan ana.

²⁸Êmbayro êt hi Apo Jesu-Cristo ay minghan bat hêñ natsi ha pangalíh hêñ kasalanan hêñ kal-atan. Kabay ha pag-orong na di ay a yay nan matsin oman gawan ha kasalanan tamo, noa, mag-orong ya, ta êmén na kowêñ hilay taganán ampangênggan kana.

Ya pamiâtang ni Apo Jesu-Cristo hêñ sarili na, ay ayn kapantag

10 ¹Ya Kautuhan ni apo Moises, ay nanad aninon bat hêñ kangêran ya antanggapêñ tamo gawan kan Apo Jesu-Cristo, haka habaytoy pangiâtang hêñ taon-taon, ta êmén mapatawad ya kasalanan lan nakadyag kasalanan, ay a makapibalal hêñ nakêm lan ampagsimba hêñ angga-angga. ²No ampakaalíh dayi hêñ kasalanan hêñ angga-angga, ya pangiâtang la, ay a hila dayin angkabyatan ha kasalanan la, haka itêgêñ la dayi ya pangiâtang la. ³Noa, ha kaptêgan, ay habaytoy pangiâtang la hêñ taon-taon, ay ampamipaihip kanla ya makasalanan hila. ⁴Ta ya daya hêñ baka o kambing, ay taganán a makaalíh hêñ kasalanan.

⁵Kabay hêñ nilumatêng yay na bayri ha luta hi Apo Jesu-Cristo, ay wana kan Apo Namalyari, ya Tatang na,

“A mo labay ya hinon ayop o kaatag pon ya an-iátang kamo hêñ tawo,

^x 9:22 Levítico 17:11

kabay pinaglêan mo kon lawini ya panluta.

⁶ Taganán a mo an-ikahigla ya hinon ayop ya ulamén hên mangátang ha pamakikwan patawad ha kasalanan.

⁷ Bayo wangko, ‘Apo Namalyari, atsi ko di, hên manyag kalabayan mo,

hên nanad ha nakahulat ha Kahulatan ya impahulat mo, ya tungkol kangko.’^y

⁸ Pakaihipén tamo ya hinabi ni Apo Jesu-Cristo. Wana ya a na taganán labay ni Apo Namalyari ya hinon ayop o kaatag ya an-iátang, haka a na etaman labay-labay ya hinon ayop ya ulamén ha pamakikwan patawad ha kasalanan, habayto man ay in-átang ha pamanhumonol ha Kautuhan.

⁹ Bayo wana êt, “Haka atsi ko di, hên manyag kalabayan mo.” Ha pangahabi nan habayto ay malinaw ya hinagilyan ni Apo Namalyari ya kamatsan ni Apo Jesu-Cristo ha manan an-iátang. ¹⁰ Haka hinonol ni Apo Jesu-Cristo ya kalabayan ni Apo Namalyari. Miminghan nan in-átang ya sarili na haka hikitamoy niluminis ha kasalanan tamo, hên dinyag hên ayn kapintasan ha arapan ni Apo Namalyari.

¹¹ Ha manan kahundoan ay allo-allo hilan nakairêng hilay pari hên antuparêng ya tungkul la. Panay hilan ampamiátang hên a ampakaalih hên kasalanan. ¹² Noa, hi Apo Jesu-Cristo, ay kaminghan nan in-átang ya sarili na ta êmén maalih ya kasalanan hên angga-angga. Hêñ nayari nay na ya habayto, ay nikno yay na ha dapit panabtab ni Apo Namalyari hên ampamaala hên kalamo na. ¹³ Bayro nay nan an-êngganan hên angga ha mapahambut ni apo Namalyari ya kapatsi na. ¹⁴ Kaminghan nan in-átang ya sarili na ta êmén na hila dinyag banal hên angga-angga, ya hilay pinili ni Apo Namalyari hên impapawa hên mag-in kana.

¹⁵ Haka ya Espiritu ni Apo Namalyari, ay ampamaptêg hên habayto kantamo gawan ha impahulat na, ya êmén di,

¹⁶ “Wanan Panginoon, ‘Habaytsi ya mag-in kahundoan ko kanlan Israelita lumatêng ya allo:

Itanêm koy utoh ko ha ihip la,
ta êmén habaytoy nay labay lan honolên.’^z

¹⁷ Bayo wana êt,

“Haka liwaan kinay kasalanan la haka pamanyag lan karawakan.”

¹⁸ Kabay no napatawad ya kasalanan, ay malinaw ya ahina kailangan hên mangátang.

Ampakapakidani kitamina kan Apo Namalyari

¹⁹ Hikaw ya patêl ko ha Panginoon, gawan ha daya ni Apo Jesus, ay makhaw ya nakêm taminan makiarap kan Apo Namalyari, hên nanad ha

^y 10:7 Awit 40:6-8 ^z 10:16 Jeremias 31:33

ampakahowên kitamina ha Kuwarto ya Pinakabanal. ²⁰Ta ha pamiátang nan lawini na, ay nanad nawakwak hên naloat ya makogpaw ya takop ya pinagpénlan bayro ha pinakabanal ya kuwarto.^a Kabay nakaloat ya bayoy dann ya palako kan Apo Namalyari. Habaytoy dann ay ayn kaatag no alwan hi Apo Jesus ya ampamiyay hên ayn angga. ²¹Hiyay pinakapoon pari tamo ya ampamaala ha pamilya ni Apo Namalyari. ²²Kabay dapat boon nakêm haka nataniêh ya paniwala tamo ha pamakiarap kana. Ta ya muwang tamo ay nalinisan kitamina ha balang kasalanan ta nanad winihikan daya na, ya karawakan nakêm tamo, haka nanad nalinisan ya lawini tamo hên lanêm ya ayn kapantag ha kalinawan.^b ²³Pakataniêhên tamoy pamagtsiwala tamo kana, ya main kitamon maêngganan kana hên ayn pamag-alangan, gawan hi Apo Namalyari ya nangako, ay tapat. ²⁴Haka pakaihipên tamo no ay-êmén kitamon mapukaw hên kaihipan hên kapareho tamo hên milulugud haka manyag kangêran. ²⁵Haka paan tamon tuwarêñ ya kaatag ya ahinan ampi-tsi-tsipon hên magsimba, noa, kailangan mipapakhaw kitamon nakêm ha miha ta miha, laloy na amêhêñ, ta angkahêlêk tamina ya marani yanay pamag-orong hên Panginoon.

²⁶No muwang tamina ya kaptêgan ya tungkol kan Apo Jesus, bayo ihundo tamo pon êt ya pamanyag kasalanan, ay ayn nanan maiátang ha ikapatawad hên kasalanan tamo. ²⁷Ta ya maêngganan tamo, ay kapapalimoy kaparusaan ha apoy ya man-alob, ya mangulam ha kaganawan ya nag-in kapatsi ni Apo Namalyari. ²⁸Ihipên tamo ya pinatsi hên ayn ingalo ya hinoman ya nanalanghang ha Kautuhan ni apo Moises, no main lowa o tatloy tistigos ya namaptêg ha dinyag nay kasalanan.^c ²⁹Mabyat pon bayro ya pamarusa ha kaganawan ya naniwala pon bayo nanalibokot ha Anak ni Apo Namalyari. Ta ha pamanalibokot la, ay intad lan ayn pukat ya daya na, ya namaptêg ha bayoy kahundoan ya nangalih hên kasalanan la hên naniwala hila. Haka ha dinyag lan habayto, ay minusmus la êt ya Espiritu ni Apo Namalyari, ya nangingalo kanla. Kabay taganán mabyat ya parusa kanla. ³⁰Ta muwang tamina ya kapangyarihan ni Apo Namalyari ya naghabi, “Hiko ya manumbah, hên mamarusa kanla.” Haka wana êt, “Hiko ya Panginoon ya manatol ha pinili ko hên mag-in maának ko.”^d ³¹Taganán kapapalimo hên malatngan ya pamarusa ni Apo Namalyari ya angkabiyyat hên ayn angga.

³²Noa, ihipên yo hên haton babayo kaw hên naniwala kan Apo Jesu-Cristo, ya nadanasan yo man hên hadyay pamairap, ay nagtêh kaw.

³³Ha arapan hên kal-atan, ay minusmus kaw, haka pinairapan. Bayo no êmbayroy dinyag la ha kalamo yo, ay andamayan yo hila etaman. ³⁴Ta

^a 10:20 Marcos 15:38 ^b 10:22 Exodus 29:21; Exodus 29:4; 30:17-21; 40:30-32;
Ezekiel 36:25 ^c 10:28 Deuteronomio 17:2-7 ^d 10:30 Deuteronomio 32:5-6

iningalwan yo hilay inhukul gawan ha paniwala la kan Apo Jesu-Cristo. Haka hên main nangayun bandi yo, ay pinaulayan yo hila hên main kahiglaan, gawan muwang yo, ya ha langit ay main kaw hên matanggap ya ayn angga ya mangêd ha bandi. ³⁵Kabay pataniêhên yoy paniwala yo kan Apo Namalyari, gawan main kaw hên maêngganan kana ya primyo ya ayn kapantag ha kangêran. ³⁶Dapat kaw hên mag-in mapagtêh ha pamanhumonol yo ha kalabayan ni Apo Namalyari, ta êmén yo matanggap ya impangako na. ³⁷Gawan main yan impahulat ya wana,

“Marani yanay pamanlumatêng nan habaytoy lumatêng.

A nan paulayan ya main mangabala ha pamanlumatêng na.

³⁸Hilay an-itad kon ayn kasalanan, ay dyanan biyay ya ayn angga gawan ha paniwala la.

Noa, hilay manalibokot ay a ko an-ikahigla.”^e

³⁹Habaytoy hinabi ni Apo Namalyari, noa, hikitamo etaman, ay alwa kitamon kalamo lan ampanalibokot ya ipapawa kan Apo Namalyari hên angga-angga, ta hikitamoy kalamo lan main paniwala ya dyanan biyay ya ayn angga.

Ya paniwala ya ayn kapantag

11 ¹Ya paniwala, ay kasiguradoan ya matupad ya an-êngganan tamo, agyan a tamo pon angkahêlêk ya habayto. ²Gawan bat ha paniwala lan ninuno tamo, ay hilay ingkahigla ni Apo Namalyari.

³Gawan ha paniwala tamo kan Apo Namalyari, ay angkaintindihan tamo ya hên ayn pon angkahêlêk, ay dinyag nay luta ya angkahêlêk, ha habi nan bat.

⁴Ihipên tamo hilay ninuno tamo ya ingkahigla ni Apo Namalyari. Alimbawa hi Abel, gawan ha paniwala na kan Apo Namalyari, ay mangêd ya átang na kanan in-átang hên kaka na hi Cain. Gawan habayto ay hiyay intad ni Apo Namalyari hên ayn kasalanan. Muwang tamo ya habayto gawan tinanggap ni Apo Namalyari ya átang na. Natsi ya man hên haton lagi, ay mamwangan tamo êt kana ya dapat magkamain kitamon paniwala.

⁵Hi Enoc etaman, gawan ha paniwala na kan Apo Namalyari, ay a ya natsi. Hên angkabiyay ya pon, ay hiyay gintan ni Apo Namalyari ha langit, kabay hiyay ahina angkahêlêk ha luta.^f Impahulat na êt ni Apo Namalyari, ya ingkahigla na hi Enoc, hên angkabiyay ya di ha luta hi Enoc. ⁶Noa, no ayn kitamon paniwala, ay a kitamo ampakapahigla kan Apo Namalyari, ta no makiingalo kitamo kana, ay kailangan hên maniwala ya taganán main Diyos, haka tumbahan nan kangêran ya kaganawan ampakapakikwanan hên makamwang kana.

^e 10:38 Isaías 26:20; Habacuc 2:3-4 Hêlkên etaman ha Roma 1:17; haka Galacia 3:11

^f 11:5 Genesis 5:24

⁷Hi Noe etaman, gawan ha paniwala na kan Apo Namalyari, ay ginilam nay impamwang ni Apo Namalyari kana, ya manyag yan barko, ta êmén hiya haka ya ahawa na haka maának na, haka hilay manuyang na ay miligtas.^g Gawan ha paniwala na ay hiyay intad ni Apo Namalyari hén ayn kasalanan, haka nag-in malinaw ya dapat parusaan hilay a nagpalokop kan Apo Namalyari.

⁸Hi apo Abraham etaman, gawan ha paniwala na kan Apo Namalyari, ay hinonol na êt ya utoh ni Apo Namalyari kana. Ta hén hiyay in-utoh ha legal ya impangako kana, ay nammita ya, a na man muwang no ay-iri ya lakwén na. ⁹Gawan ha paniwala na, ay nagtêêh yan nagbuyot hén nagpaidi ha tolda bayro ha legal ya impangako kana ha kaatag ya bansa. Émbayro êt hén nagpaidi ha tolda, ya anak na hi Isaac haka hi Jacob ya apó na, ya kapareho ni apo Abraham hén pinangakoan ni Apo Namalyari hén habaytoy legal. ¹⁰Nagtêêh ya bayro hi apo Abraham, gawan an-êngganan nay paidyanan na ha napah-éy ya balayan ha langit, ya tinalagá, haka impairêng ni Apo Namalyari.

¹¹Hi Sara^h etaman, ya ahawa ni apo Abraham, ay gawan ha paniwala na, ya hi Apo Namalyari ay mapaypaniwal-an, ay nagkaanak ya, layuh ya man haka toa hilay nay miahawa. ¹²Agyan êndat ni apo Abraham ya a yay na magkaanak gawan mantêg yay nan toa, ay hiyay nag-in ninuno hén kal-atan ya a makwan mabilang êmén ha kal-at hén bêtewén ya angkahêlêk ha langit haka baláh ha laylay dagat.

¹³Hilay habaytoy inungkat ko, ay naniwala pon hén hilay natsi. A la man nakwa ya impangako kanla ni Apo Namalyari kaban angkabiyay hila pon, ay nanad lay na hén angkahêlêk ya habayto ha marayo, gawan ha paniwala la. Impamwang la ya hata luta ay alwa lan mantêg paidyanan. ¹⁴Malinaw ya hilay êmbayroy pangahabi, ay main an-êngganan ya mantêg lan paidyanan ha langit. ¹⁵Alwan ubatan la ya labay lan orongén, ta main hila man hén panaon hén mag-orong bayro, ay a hila nag-orong. ¹⁶Noa, ya labay-labay lan lakwén, ay mangêd pon bayro ha ubatan la. Yabay ya balayan ha langit. Kabay a ya marêng-éy hi Apo Namalyari hén hiyay baêgén lan Diyos la. Muwang tamoy habayto ta pinangil-an na hilan balayan.

¹⁷Nahêlêk etaman ya nataniêh ya paniwala ni apo Abraham, hén hiyay in-utoh ni Apo Namalyari hén iátang ya anak na hi Isaac. Hiyay a nanalanghang kan Apo Namalyari, hi Isaac man ya kamiha-mihaan nan anak ya impangakoⁱ kana ni Apo Namalyari, hén wana, ¹⁸ya hi Isaac ya mag-in ninuno hén kaapo-apoan na. ¹⁹Naniwala ya, ya biyayênan oman ni Apo Namalyari hi Isaac. Haka nanad biniyay yan oman hi Isaac, gawan no a ya dayi binawal ni Apo Namalyari, ay pinatsi nay na dayi hi Isaac.

^g 11:7 Genesis 6:9; angga ha 8:22 ^h 11:11 Genesis 18:15; 21:1-2 ⁱ 11:17 Genesis 22:1-19

²⁰ Hi Isaac etaman, ay gawan ha paniwala na kan Apo Namalyari, ay inhalangin^j na hilay anak na, hi Jacob haka hi Esau, ya ingalwan hila dayi ni Apo Namalyari ha arapên la.

²¹ Hi Jacob etaman, bayo ya natsi, ay gawan ha paniwala na kan Apo Namalyari, ay inhalangin^k na ya loway anak ni Jose, ya ingalwan hila dayi ni Apo Namalyari ha arapên la. Bayo nagtêkêni hi Jacob, haka sinimba na hi Apo Namalyari.

²² Hi Jose etaman, hên marani yay nan matsu, ay gawan ha paniwala na kan Apo Namalyari, ay impamwang nay pag-alíh lan Israelita ha bansom Egipto, haka namiutoh ya kanla, ya ha pag-alíh la ha bansom Egipto, ay gêtan lay but-o na hên iilbêng ha legal ya lakwên la.

²³ Hilay toa etaman ni apo Moises, gawan ha paniwala la kan Apo Namalyari, ay a hila nalimo hên nanalanghang ha utoh^l hên ari ya dapat patsén ya kapianak ya lalaki. Hên nahêlêk lay mahampat ya nag-in anak la, ay intago la hi Moises hên tatloy buwan.

²⁴ Hi Moises etaman, ay hiyay hinayhay hên anak ni Faraon, ya ari. Noa, hên nagkanakêm yay na, ay gawan ha paniwala na kan Apo Namalyari, ay tinalibatokan nay habayto, ²⁵ta êmên na makalamo hilay pinili ni Apo Namalyari hên mag-in anak na, hadyay kairapan man ya angkaranasan la, kanan magpakapda hên manyag kasalanan, ta muwang na ya a mabuyot ya habaytoy kahiglaan. ²⁶Ta inihip na, ya mangêd ya magdanas yan pammusmus gawan ha paniwala na ha Mesias, ya impangakon Mámiligtas, kanan iubuh kana ya pibandian ha bansom Egipto, ta an-êngganan nay matanggap na ha langit.

²⁷Gawan êt ha paniwala na kan Apo Namalyari, ay nag-alíh ya ha Egipto, hên a nalimo ha huluk nan ari. Ta nanad nay nan angkahêlêk hi Apo Namalyari ya a angkahêlêk. ²⁸Gawan êt ha paniwala na kan Apo Namalyari, ay hinonol nay in-utoh^m kanla ya mamatsi hilan tupa, ta ipunih lay daya ha kabat hên bali la. Dinyag lay habayto, haka hên nagdann bayro ya anghel hên kamatsan, hên patsén ya punganay lan Egipcio, ay a natsi ya punganay lan Israelita.

²⁹Hila etaman ya Israelita, gawan ha paniwala la kan Apo Namalyari, ay nakabatah hila ha bonak hên Dagat ya Naorit ya pinamala ta êmên hila nakaddan. Noa, hên magbatah dayi hilay Egipcio, ya ampangorong kanla, ay nilêmêh hila gawan nag-orong ya lanêm.

³⁰Gawan êt ha paniwala la kan Apo Namalyari, ay nigêyma ya katag-ayan bakod ya dyag ha bato ya nakapalibot ha balayan Jericoⁿ pangayari lan nilibot hên pitoy allo. ³¹Hi Rahab^o etaman, ya taga-Jerico,

^j 11:20 Genesis 27:1-40 ^k 11:21 Genesis 48:1-20 ^l 11:23 Exodus 2:1-10 ^m 11:28 Bayron nag-umpisa ya Pistan Pangaligatas ha Egipto. Exodus 12:1-36 ⁿ 11:30 Josue 6:1-21
^o 11:31 Josue 2:11-22; haka 6:22-25

agyan miha yan hostis, ay a ya pinakilamo kanlan a naniwala kan Apo Namalyari ya pinatsi. Gawan ha paniwala na kan Apo Namalyari, ay hiyay nanawop kanlan nangimaton, ya in-utoh ni Josue ha Jerico.

³² Gawan ha paniwala la kan Apo Namalyari, ay kal-atan kapapaépapah ya dinyag lan Gideon, Barak, Samson, Jefte, David, Samuel, haka hilay mámipamwang hén an-ipaihip kanla ni Apo Namalyari. Noa, kulang ya panaon hén ungkatén ya habayto ya tungkol ha nag-in biyay la. ³³ Mal-at ya nadyag lan habayto gawan ha paniwala la. Ya kaatag kanla, ay nanambut ha kal-atan bansa. Ya kaatag ay namaala hén main katoynungan. Ya kaatag ay nakatanggap hén impangako kanla. Ya kaatag etaman ay nakapa-tsikum hén bêbêy leon. ³⁴ Ya kaatag ay nakaparé hén apoy ya mamaalob. Ya kaatag êt ay naligtas ha tabtában. Ya kaatag ay pinakhaw, haka ya kaatag ay nag-in makhaw ha pamakilaban kabay angkaipaplag lay kal-atan hundaloh lan kaatag ya bansa. ³⁵ Main hén babayi ya kinamatsan, ya biniyay oman ya habaytoy anlugarên la.^p

Main kaatag ya natsi ha hadyay pamairap kanla, gawan a la impuglaoh ya paniwala la kan Apo Namalyari. A la impuglaoh ya paniwala la gawan labay la hén madyanan biyay ya ayn angga ha langit. ³⁶ Main kaatag ya pinairapan hén minusmus, haka dinapi. Kaatag pon ay inhukul hén nakagapoh hén taykala. ³⁷ Main kaatag ya pinatsin pinbabato. Ya kaatag ay nilagari hén pinakay lawini. Ya kaatag êt ay pinatsi ha êetak. Hilay kaatag ay pinaalíh ha balayan la. Dinanas la ya hadyay pamagkulang ha kaganawan kailangan. Nakatakop hila tanan katat hén tupa haka kambing hén nagdanas hén hadyay pamairap. ³⁸ Nanad alwan hépat kanla hén paidi hén kalamo lan a nagpalokop kan Apo Namalyari. Kabay nikotaw-kotaw hila hén napaidi ha kabalab-balahan, ha tinatawgtug, nilêyang-lêyang haka ha tinanil-tanil.

³⁹ Ingkahigla hila ni Apo Namalyari gawan ha paniwala la. Noa, a la pon nakwa ya impangako kanla ni Apo Namalyari, hén angkabiyyay hila ha luta, ⁴⁰ gawan tinalagá ni Apo Namalyari ya hikitamo etaman, ay makalamo ha impangako na, ya ayn kapantag ha kangérán, ta êmén hila haka hikitamo ay pare-pareho hén mag-in ganap.

Dapat palokop kan Apo Namalyari ya Tatang tamo

12 ¹No ialimbawa tamo ya pamanhumonol tamo kan Apo Namalyari ha hali-tagtagán, ay hilay habayto ya inungkat ya nananiéh ya paniwala kan Apo Namalyari, ay nilaténg hilay na ha anggaan hén hali-tagtagán. Haka nanad nakapalibot hilan kal-atan hén ampamantay kantamo ha pamaki-hali-tagtagan tamo. Kabay kailangan tamon paghêhêan

^p 11:35 1 Hari 17:19-24; haka 2 Hari 4:18-37

hên alihêñ ya pamanyag kasalanan, ta êmén ayn makahabkol ha pamagtêêh tamo ha pamaki-hali-tagtagan, ta êmén tamo maabutan ya anggaan. ²Dapat panay tamon ihipêñ hi Apo Jesus, ya ampangubatan hên paniwala tamo haka ya ampamataniêh hên paniwala tamo hên angga ha ayn pamagkulang ya habayto. Impahlêk na kantamo no ay-êmén ya pamagtêêh na hên hiyay impako ha koros, hên a na ingkarêng-êy ya habayto ta an-êngganan nay mag-in kahiglaan na ha langit. Haka ampikno yay na ha dapit panabtab ni Apo Namalyari hên ampamaala hên kalamo na.

³Dapat tamon ihipêñ ya pamagtêêh ni Apo Jesus ha hadyay pamanalanghang kana hên hilay mapanyag kasalanan, ta êmén a kitamo mahiraan nakêm, haka a kitamo humawa hên humonol kana. ⁴Ha pakikwanan yon manambut ha kasalanan, ay a êt niabot ha ikamatsi yo, ya pamakilaban yo. ⁵Kayno naliwaan yoy nay impahulat ni Apo Namalyari kamoyun maának na, ya dapat mag-in aral kamoyu, ya wana,

“Anak ko, paan mon daygêñ ngaw-ngaw ya pamarala na kamo hên Panginoon,

haka paan kan mahiraan nakêm no an-itoynong na ka.

⁶ Ta amparal-an ni Apo Namalyari ya hilay anlugarûn na,
haka an-itoynong nay an-itad nan maának na.”^q

⁷Dapat yon pagtêêhan ya kairapan ya lumatêng kamoyu, ta habaytoy pamarala kamoyu ni Apo Namalyari. Habaytoy ampamaptêg hên maának na kaw. Yarin main anak ya a amparal-an hên tatang na! ⁸No a na kaw paral-an ni Apo Namalyari hên nanad ha kaganawan maának na, ay alwa kaw awud hên mantêg hên maának na. ⁹Pinaral-an kitamo hên tatang tamo di ha luta, haka an-igalang tamo hila. Lalo dapat tamon pagpalokopan hi Apo Namalyari, ya nag-in Tatang tamo ha langit, gawan ha paniwala tamo kana. Ta ha êmbayro, ay magkamain kitamon biyay ya ayn angga! ¹⁰U-ungnon bat ya taon, ay pinaral-an la kitamo hên toa tamo do ha an-ihipêñ lay ustô. Noa, panay ha ikangêd tamo ya pamarala kantamo ni Apo Namalyari ta êmén kitamo mag-in banal, hên nanad kana. ¹¹Nahakit man, haka kapalungkot ya hinon pamarala, ay pamakayarin habayto, ay mag-in mahonol kana ya pamimiyay lan nagpatoro bayro, haka magkamain hilan kapatêkbêkan nakêm.

Aral haka panaad

¹²Kabay no nanad napagal kaw ha pamaki-hali-tagtagan, ay pakataniêhêñ yoy nakêm yo. ¹³Dapat mag-in alimbawa ya pamimiyay yo, ta êmén mapataniêh yoy paniwala lan ampag-alangan.

¹⁴Pakikwanan yon mamiyay hên main pamikahundo ha kapareho yo haka dayuán yoy pamanyag kasalanan. Ta hilay labay hên

^q 12:6 Kawikaan 3:11-12

manyag kasalanan, ay a makapakilamo ha Panginoon lano ha langit.

¹⁵ Mihahawop kaw ta êmén ayn miha man kamoyu ya manalibokot ha ayn kapantag ya ingalo ni Apo Namalyari. Paan kaw magtaném hên hakit nakêm ta êmén a mayawa ya kal-atan gawan habaytoy pangubatan hên gulo. ¹⁶ Dapat ayn miha man kamoyu ya mag-in nanad kan Esau,^r ya ayn limo kan Apo Namalyari, ya mapanyag karawakan kalabayan lawini, haka namihagili hên karapatan hên pagkakabaya na ha pêpérâd ya pamangan. ¹⁷ Muwang tamo ya hên naghêhê ya ha pagkahagili hên karapatan hên pagkakabaya na, ay ahina indin kana ya in-utoh ni Apo Namalyari ya midin kanlan kabaya. Pakikwaan na man dayi ya habaytoy ingalo ya ubat kan Apo Namalyari hên main kalamoy pamandoko haka luwa, ay ahina naidin kana ya habayto.

¹⁸ Kabay pakikwanan tamon ihundo ya paniwala tamo, gawan mangêd ya bayoy kahundoan ni Apo Namalyari kantamo kanan manan kahundoan na ha ninuno tamo. A tamina andanasan ya kapalimo ya nadanasan lan ninuno tamo bayro ha Tawgtug Sinai hên nahêlêk lay apoy ya mamaalob, hadyay diglêm haka hadyay hêkaw angin. ¹⁹ Nakagilam hila êt hên tonoy tambuyok haka ya kapapalimoy habi ni Apo Namalyari. Hênggilam lay habi, ay nakiingalo hila ya itunggén dayi ya habayto. ²⁰ A la matêêh hên manggilam habaytoy utoh ya indin kanla, “Agyan ayop man ya dumani ha tawgtug ya habayto, ay dapat batoêñ hên angga ha mapatsi.”^s ²¹ Gawan ha hadyay kapapalimo ya nahêlêk la, ay nalinwan ya etaman hi apo Moises, ya wana, “Ampamêgpêg ako ha hadyay limo ko!”^t

²² Noa, hikitamo etaman ya ampaniwala amêhêñ, ay dinumani kitamina ha Tawgtug Sion,^u ya mantêg balayan Jerusalem ha langit. Dinumani kitamina ha balayan ni Apo Namalyari ya angkabiyay hên ayn angga bayro, ha ampaidyanan hên kal-atan anghel ya a makwan mabilang, ya ampagsimba kana hên main hadyay kahiglaan. ²³ Inlamo kitamina ha pagtsiponan lan maának ni Apo Namalyari ya dyanan biyay ya ayn angga, ya nakahulat ha langit ya langan. Naabutan taminay arapan ni Apo Namalyari, ya ampanlingon ha balang miha. Inlamo kitamina kanlan kal-atan ya mahonol kana ya nuna kantamo bayro ha langit, ya habaytoy intad ni Apo Namalyari hên ayn kasalanan. ²⁴ Inlamo kitamina kan Apo Jesus, ya mámilatan ha bayoy kahundoan ni Apo Namalyari ha tawo, haka ya daya na, ay nanad inwihik kantamo. Mapakinabangnan tamoy habaytoy daya na, alwan daya ni Abel^v ya ampakikwa bat hên pamanumbah.

²⁵ Kabay paan kitamon magma-matlakan ha an-ipagilam na kantamo ni Apo Namalyari. No a hila nailigtas ha parusa, hilay unan a nanggilam

^r 12:16 Genesis 25:27-34 ^s 12:20 Exodus 19:12-13 ^t 12:21 Deuteronomio 9:19

^u 12:22 Hêlkên ha panlêkan labay habiêñ hên habi. ^v 12:24 Genesis 4:10

ha panaad ni Apo Namalyari ya impamwang ni apo Moises kanla di ha luta, ay yarin miligtas kitamo, no a kitamo manggilam ha panaad ni Apo Namalyari kantamo! ^w26 Hêñ haton lagi bayro ha Tawtug Sinai^w ay nayêgê ya luta hêñ naghabi hi Apo Namalyari, noa, amêhêñ, ay nangako ya, ya wana, “Minghan ko pon êt hêñ yêgyêgêñ ya luta, haka alwan bat luta ya iyêgêñ ko, noa, anggan kaganawan ya angkahêlêk ha langit.” ²⁷Ha pangahabi nan, “Minghan pon êt,” ya labay habiên hêñ habayo, ay alihêñ nay mayêgyêg ya dinyag na, ta êmêñ magpaayn angga ya kaganawan ya a mayêgyêg ha ampaidyanan na ha langit.

²⁸Kabay pahalamatan tamo hi Apo Namalyari ta kalamo kitamo ha pamanlokop na, ya ayn anggaan, haka ya a angkayêgê. Simbaêñ tamo ya hêñ main pamanggalang haka kaaypaan nakêm. ²⁹Gawan hi Apo Namalyari, ya ansimbaêñ tamo, ay maialimbawa ha apoy ya ampakaulam no ampamarusa ya.

Ya pamanhumonol ya ampamahigla kan Apo Namalyari

13 ¹Dapat yon ihundo ya pamilulugud yo, gawan patêl kaw ha Panginoon. ²Dapat mag-in mahigla ya pamahowêñ yo kanlan ubat ha marayo, ya lumatêng bahêñ, ta ha êmbayro, ay main nanan nakapahowêñ hêñ anghel ni Apo Namalyari hêñ a la muwang. ³Dapat yon ingalwan ya kapareho yo, ya atsi ha hukulan haka hilay ampairapan gawan ha paniwala la kan Apo Jesu-Cristo. Pakidamayan yo hila hêñ nanad sarili yon lawini ya ampairapan.

⁴Hilay nipag-ahawa, ay dapat lan galangêñ ya pamag-ahawa la. Haka kailangan pareho hilan mag-in tapat ha miha ta miha. Ta parusaan ni Apo Namalyari hilay ampanakêh ha alwa lan ahawa.

⁵Paan kaw mag-in kamata hêñ pera. Dapat mahigla kaw hino man ya kapanapolan yo. Ta wani Apo Namalyari ya, “A kataw lakwanan o paulayan man.”^x ⁶Kabay makhaw ya nakêm tamon maghabin êmêñ di,

“Hi Panginoon ya ampanawop kangko,
kabay a ko angkalimo.

Ayn makaantsi kangko!”^y

⁷Dapat yon ihipêñ ya hilay unan namaala kamoyu, ya nanoro kamoyu hêñ habi ni Apo Namalyari, no ay-êmêñ nahêlêk ya kangêran ha pamimiyay la, haka no ay-êmêñ hila natsi. Haka dapat yon tuwarêñ ya paniwala la. ⁸Hi Apo Jesu-Cristo etaman, ya ampaniwal-an la, ay a ampangoman. No ay-êmêñ ya hêñ hato, ay êmêñ ya êt bayro amêhêñ haka hêñ angga-angga. ⁹Paan kaw pagtan ha hinoman ya toro ya kalokwan. Mangêd no ya paniwala yo ay antumaniêh gawan ha ayn kapantag ya ingalo ni Apo Namalyari, kanan pamanhumonol ha

^w 12:26 Hagai 2:6 ^x 13:5 Deuteronomio 31:6 ^y 13:6 Awit 118:6

patakaran ya tungkol ha bawal hēn kaēn. Ya pamanhumonol kanlan habaytoy patakaran ay a ampakataniēh hēn paniwala.

¹⁰Hilay ampamihundo hēn pamiatang lan ayop ha pagsimbaan hēn pamanhumonol ha Kautuhan ni apo Moises, ay a makapakilamo kantamo, ya makiarap kan Apo Namalyari gawan kan Apo Jesus ya namiatang hēn sarili na. ¹¹Habaytoy daya lan ayop ya an-iātang taon-taon para ha kasalanan, ay gintan nan pinakapoon pari ha Pinakabanal ya Kuwarto. Noa, ya lawini lan ayop ya in-ātang, ay in-ulam ha marayo-dayo ha paidyanan la. ¹²Embayro etaman hi Apo Jesu-Cristo, ay gintan ha marayo-dayo ha balayan hēn impako ha koros, hēn hiyay natsi, ta êmēn malinisan kitamo ha kasalanan tamo hēn daya na. ¹³Kabay lakwēn tamo hi Apo Jesus ha marayo-dayo ha balayan, ya labay habiēn, magpapawa kitamo kanlan êndat la ya mag-in hilan mangēd ha hēlēk ni Apo Namalyari ha pamanhumonol ha Kautuhan, haka makilamo kitamo kan Apo Jesus. Magtēh kitamo ha pamandaêh hēn nanad ha tinéeh na. ¹⁴Gawan alwan bayri ha luta ya paidyanan tamo hēn ayn angga, noa, main kitamon an-êngganan, ya balayan ha langit ya ayn angga. ¹⁵Kabay panay kitamon magpuri haka magpahalamat kan Apo Namalyari gawan kan Apo Jesus, ta habaytoy átang lan ampaniwala kana. ¹⁶Paan tamon liwaan hēn manyag kangēran haka manawop ha kaatag, ta habayto êt ya átang ya ampamahigla kan Apo Namalyari.

¹⁷Palokop kaw kanlan ampamaala kamoyun ampaniwala, ta hilay ampakapataniēh hēn paniwala yo, haka pakibatan la kan Apo Namalyari no a la daygēn ya habayto. No honolēn yo hila, ay mahigla lan tuparēn ya tungkulon la. Noa, no a yo hila honolēn, ay tumabang hila, haka habaytoy alwan ha ikakangēd yo.

¹⁸Ihalangin yo kay. Angkasigurado naēn ya malinis ya konsinsya naēn, ta ampakapakikwanan naēn, ya makapamiyay kay hēn main kangēran hēn allo-allo. ¹⁹Ampakidoko ko kamoyu ya ihalangin yo ko ya tampol akon makaorong bahēn kamoyu.

Inhalangin hilay hinulatan

²⁰⁻²¹An-ihalangin kataw ya hi Apo Namalyari ya ampangubatan hēn kapatēkbēkan ay mam-i kamoyu hēn kaganawan kailangan yo, ta êmēn ha hawop ni Panginoon Jesu-Cristo, ay mahonol yoy kalabayan na, ya makapahigla kana. Hiyay namabiyay oman kan Panginoon tamon Jesus, ya pastol ya ayn kapantag, ya natsi hēn nam-in daya na, ya namaptēg ha bayoy kahundoan ya ayn angga. Puriēn tamo hi Panginoon Jesu-Cristo hēn ayn angga! Amen.

Tawlin habi

²²Patēl ha Panginoon, paan kaw dayi hēn humawa ha an-iaryl ko kamoyu di, ta alwa etaman makarang ya hata hulat. ²³Labay ko êt hēn

ipamwang kamoyu, ya hi Timoteo, ya patêl tamo ha Panginoon, ay in-awah ha hukulan. No tampol yan makalatêng bayri, ay pagkalamo ko ya ha paniraw ko bahêñ.

²⁴Ikumusta yo kay awud kanlan ampamaala kamoyu, haka kanlan kaganawan ya pinili ni Apo Namalyari hêñ mag-in kana ya atsi bahêñ. Angkumustaêñ kaw etaman lan patêl ha Panginoon ya taga-bansan Italia.

²⁵Ingalwan na kaw dayi ni Apo Namalyari.